


**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XLI No. 14  
Hulyo 21, 2010  
[www.philippinerevolution.net](http://www.philippinerevolution.net)

Editorial

# Rebolusyon, di malutos sang kusog kag paniplang sang rehimeng US-Aquino



**S**a pihak sang pahayag sang rehimeng US-Aquino nga bukas ini nga makigsugilanon pangkalinungan sa mga rebolusyonaryong pwersa, wala pa man ini magsugod sari-sari na nga mga sablag ang ginalatag sini.

Una na diri ang mandu ni Benigno Aquino III sa AFP nga dugmukon ang rebolusyonaryong kahublagan. Agud himuon ini, mayor nga pagasandigan sang iya rehimen ang pasista nga pwersang militar nga may plano nga labi nga padakuon, himuon nga moderno kag dugangan sang armas, kagamitan kag benepisyo para sa mga upisyal kag tinawo sini.

Agud matigayon ini, nagakaraksa subong ang iya rehimen nga magpatuhaw sang ginatos ka bilyong piso, sa atubang sang grabeng krisis sa nagadaku nga depisit kag pagpangutang sang gubyrno.

Sandig sa mandu sang ila amo, gilayon man nga ginlatag nanday Defense Secretary Voltaire Gazmin kag AFP Chief of Staff Ricardo

David ang militaristang linya sang rehimeng Aquino. Tuman kahambog nga ginhambal ni David nga handa ang AFP nga ipatuman ang mandu ni Aquino nga dugmukon ang rebolusyonaryong kahublagan sa sulod lang sang tatlo ka tuig. Gindeklarar man ni Gazmin nga dapat isurender anay sang BHB ang mga armas sini antes madayon ang sugilanon pangkalinungan. Kaladlawan ang mga deklarasyon nga ini bangud wala nagakinahanglan nga magbiya sang armas ang rebolusyonaryong kahublagan kag paliwat-liwat na nga napamatud-an sa nagligad nga tanan nga gintakda nga dedlayn sang papet nga rehimen kag AFP para kuno dugmukon ang rebolusyonaryong kahublagan nagpabilin nga satsat lang.

Wala sang kinatuhay sa hayagan nga pasistang linya nanday Gazmin kag David ang linya sang bag-o nga puno sang Office of the Presidential Adviser on the Peace Process (OPAPP) nga si Teresita Deles. Wala sang pagpaminsar nga ginsuportahan ni Deles ang linya nga DDR (*disarmament, demobilization* kag *reintegration* o pagdis-arma, pagbungkag kag pagsurender sang mga rebelde) sang rehimeng Arroyo. Bisan hayag nga pagpangguba ini sa

*Mga tampok sa  
isyu nga ini...*

**Plano sa pagpili  
kay Etta Rosales,  
ginpakamalaut** PAHINA 4

**20 suldado napatay, 8  
armas naagaw sg  
BHB** PAHINA 6

**Pagrebyu sa PEACE  
Bonds**

PAHINA 7

sugilanon pangkalinungan, tiko nga ginaron ni Deles nga “ang doktrinang DDR kabahin sang anuman nga proseso pangkalinungan.”

Papel sang OPAPP ang pagpatuman sang malaut nga katuyuan nga tapuson ang armadong inaway nga may pagtum-ok sa paggamit sang pagpaniplang kag pagsiod, katuwang ang pasistang kusog sang reaksyunaryong militar. Salambiton pirme ni Deles ang ginatawag nga “apat nga sandigan” sang rehimeng US-Aquino para kuno agumon ang kalinungan—pagpauswag kag rekonstruksyon sang ekonomya, pagpauswag sang mga basehang serbisyo, maayo nga pagdumala kag pagreporma sa sektor pangseguridad—nga ginkuha lang sa bag-o nga Counterinsurgency Guide sang US. Sa balayon nga ini, ang sugilanon pangkalinungan pagagamiton lang nga pangsiod o indi gani pangbuyo, indi bilang paagi para sa pagsugilanon kag lubaron ang mga ugat sang inaway.

Wala unod ang pormula nga ini. Wala sang padulungan ang anuman nga padihot nga “reporma” kag pagpahamot santo sa nasambit nga pormula bangud halin sa puno tubtub sa punta napun-an sang kaga-

rukan kag korapsyon ang bilog nga sistema nga ginasudlan kag gin-alagaran sang rehimeng US-Aquino. Sa likod sang tanan nga mapanghaylo nga postura sini, ang padayon nga mayor nga katumbas sa nagabato nga pumuluyo amo ang pasistang kusog sang papet kag reaksyunaryo nga estado.

Ang pagpamuno sa OPAPP sang anti-komunista nga si Deles nagakahulugan sang pagpangibabaw sang hubon sang mga pareho niya nga nagapakuno-kuno nga progresibo sa pagpadalagan sang proseso pangkalinungan. Paagi sa ila tingubon ang kuno progresibong balayon sang mga sosyal-demokrata sa pasistang balayon sang AFP kag iban pa nga pwersang pangseguridad sang estado. Ginalatag bilang kalubaran kuno sa mga basehang problema sang


pumuluyo kag himuon nga katumbas sa pungsodnon-demokratikong programa sang rebolusyonaryong hublag ang manabaw kag mapaniplang nga mga programa sang mga sosyal-demokrata para kuno sa tawhanong-kinamatarung, reporma sa duta kag iban pa.

May mga pahito pa si Deles para ipakita nga “demokratiko” ang sugilanon pangkalinungan pero sa aktwal mga paagi lang ini para hampangan kag pakagamayon ang importansya sang proseso. Antes ang pormal nga negosasyon, palaparon anay kuno nila ang mga konsultasyon sa nagkalain-lain nga sektor kag sa mga lokalidad. Ginapili pa kuno nila kon sa diin nga erya sila mayor nga magatum-ok. Padihot lang ang pagpakuno-kuno nga ini agud liwat nga

ilarga ang mga “lokalizado nga sugilanon pangkalinungan” nga madugay na nga tuyo paserbihon sang mga nagtaliwan nga papet kag reaksyunaryong rehimen agud ukon ang sugilanon sa nasyunal nga lebel.

Daan na nga gintilawan sang mga nagligad nga rehimen ang padihot nga ini. Kuno nagakonsulta kag nagasugilanon ang OPAPP sa malapad nga sektor sang katilingban, pero ang matuod ginasugilanon lang sang rehimen ang iya kaugalingon. Panggamo kag pangbuyo lang ang padihot nga ini. Para mapatihan ang sugilanon pangkalinungan, dapat ini himuon sa tunga sang liderato sang duha ka bahin sa nasyunal nga lebel kag magtum-ok sa mga basehan nga halambalanon.

Sa kamatuoran, wala gid man sang kinahanglanon para sa kuno malaparan nga konsultasyon kag dayalog nga ginapadihot sang OPAPP. Daan na nga maathag kag nahisugtan sa The Hague Joint



Tuig XLI No. 14 Hulyo 21, 2010

Ang *Ang Bayan* ginabantala sa leng-gwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

[www.philippinerevolution.org](http://www.philippinerevolution.org)

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan. Malab-ot kami paagi sa e-mail sa: [angbayan@yahoo.com](mailto:angbayan@yahoo.com)

## Kaundan

### Editorial

Rebolusyon, di malutos sg kusog kag paniplang sg rehimeng US-Aquino 1

### Pagpanghalit sg pasistang estado

Padayon ang pagpamatay 3  
Plano nga pagpili kay Etta Rosales 4  
Morong 43 hilwayon na! 5  
Mga upisyal militar sa Panay, ginkiha 5

### Madinalag-on nga TO

20 suldado patay, 8 armas naagaw 6  
POW, ginhilway na 6

Pagrebayu sa PEACE Bonds 7

### Sa luwas sg pungsod

Mahuyang nga sitwasyon sa Nepal 8  
26 paramilitar, patay sa ambus sa India 8  
Welga sa India 9

Balita 9

Ang *Ang Bayan* ginabantala duha ka beses kada bulan sg Komite Sentral sg Partido Komunista sg Pilipinas

Declaration of 1992 ang mga prinsipyo, balayon, basehang halambalanon nga pagatalakayon kag ang pagpasunod sang mga ini sa negosasyon pangkalinungan. Ang pagpadihot ni Deles sang mga palitik nga konsultasyon kag dayalog pamaagi para ipahigad ang nauna nga mga kasugtanan, gamuhon ang adyenda kag tabunan ang mga sustantibong halambalanon.

Sa bahin sang negosasyon pangkalinungan sa Moro Islamic Liberation Front, nagpagguwa na sang pahayag ang tagapamaba ni Aquino kag ang bag-o nga ginbutang nga puno sang panel sang gubyernong Aquino nga indi sila magsugot nga tulungaon ang republika kag sa anuman nga areglo nga "liw-as" sa konstitusyon. Butot hambalon, pagapadayunon lang sini ang tindog sang rehimeng US-Arroyo batuk sa pagtukod sang tunay nga awtonomya para sa Bangsamoro. Liw-as na ini sa pangunahon nga ginaduso sang MILF.

Wala naman sang matabo nga sugilanon pangkalinungan kon hampangan, butangan sang mga sablag, warikon kag gamiton lang ini para tiplangon kag ihigot ang mga rebolusyonaryong pwersa sa wala sang padulungan nga sugilanon samtang paspas ang pagtuyo sang rehimeng US-Aquino nga dugmukon sila gamit ang ginpadaku kag ginpabaskog nga pasistang AFP. Indi magmadinalag-on ang anuman nga mga padihot sang bag-o nga papet kag reaksiyunaryong rehimen padulong diri.

May sugilanon pangkalinungan man o wala, kag anuman kabaskog ang ginakasa nga mga kontra-rebolusyonaryo nga opensiba sang papet nga reaksiyunaryong estado, magapadayon kag indi malihis ang mga rebolusyonaryong pwersa kag pumuluyo sa pagsulong sang rebolusyonaryo nga paghimakas tubtub maagum ang lubos nga kada-lag-an. AB

## Padayon ang pangpulitika nga pagpamatay sa pungsod

**L**ima nga katapo kag tagasuporta sang mga progresibong grupo ang ginpatay sa sulod sang una nga duha ka simana sang rehimen ni Benigno Aquino III. Pareho sang nagligad nga rehimen, ang ginatudlo nga mga kriminal nga armadong lalaki nga naka-*bonnet* kag nakamotorsiklo nga lunsay mga gaway sang reaksiyunaryong militar.

**Hulyo 16.** Tatlo ka adlaw antes ilubong si Fernando Baldomero, 61, ang pinakauna nga biktima sang pangpulitika nga pagpamatay sa idalum sang bag-ong rehimen, ginpatay ang iya pakaisa nga si Zosimo Ingeniero, 57 anyos. Si Ingeniero, isa ka barangay tanod, nakita nga patay malapit sa iya balay sa Baryo San Ramon, Malinao, Aklan. Lima ka basiyos sang 9-mm ang nakita malapit sa iya bangkay. Nangin aktibista siya sang dekada 1980 tubtub 1990.

**Hulyo 9.** Gin-ambus kag napatay sanday Mark B. Francisco, 27 anyos, kag Edgar Fernandez, 44 anyos, pareho nga katapo sang ACT Teachers Party. Si Francisco, isa ka maestro sa San Isidro Elementary School sa banwa sang Palanas, Masbate nagapauli upod ang apat nga kapareho nga titser sang palukpan sila sa Barangay Malibas. Nakalibre ang mga upod niya nga titser. Si Fernandez, maestro sa Roco C. Pahis Sr. Central School sa Masbate City nagapauli man sang luthangon sang mga wala nakilala nga lalaki.

**Hulyo 9.** Ginluthang sang malapitan si Pascual Guevarra, 78 anyos ang panuigon, pangulo sang Agrarian Reform Beneficiaries Association sa banwa sang Laur, Nueva Ecija kag isa sa mga pinakagitulang nga lider sang Alyansa ng mga Magbubukid na Nagkakaisa 3100 (Alamana), nga katapo sang Alyansa ng mga Magbubukid sa Gitnang Luzon (AMGL) kag Kilu-

sang Magbubukid ng Pilipinas. Ang mga katapo sang Alamana nagahimakas para mabawi ang 3,100-ektaryas nga duta nga sakop sang Fort Magsaysay Military Reservation. Nagaluto sang panyapon sa iya balay si Guevarra sa Baryo San Isidro, Laur bandang alas-4:45 sang hapon sang siya patyon. Gintuyo siya nga buligan sang iya apo pero gintiro man ini sang kriminal. Nakapalagyo ang berdugo sang buligan ini sang iya kaupod nga nakasakay sa motorsiklo nga nagahulat sa guwa sang kudal sang biktima.

**Hulyo 9.** Gin-ambus si Miguel Belen, reporter sang dwEB-FM sang Filipinas Broadcasting Network sa Nabua, Camarines Sur. Nagapauli siya sa ila balay sa San Jose Pagaraon sang luthangon siya. Nag-angkon si Belen sang igo sang bala sa iya liog kag lawas kag ara sa kritikal nga kahimtangan sa isang ospital sa Iriga City.

**Hulyo 6.** Lima ka lalaki nga naka-*bonnet* kag nakabayo sang militar ang nag-ambus kay Dexter Legaspi, 36 anyos, isa ka maestro kag katapo sang ACT Teachers Party. Nakasakay sa isa ka traysikel sanday Legaspi lambatan pero nakalibre sila sa kamatayon.

**Hunyo 27.** Gintiro sa dughan si Fernando Bejino, 45, aktibista nga mangunguma sa Siaton, Negros Oriental. Ginatumod nga susppek sa pagpatay ang isa ka ahen-  
te sang 79th IB, suno sa KARAPATAN-Central Visayas. AB



# Plano nga pagpili kay Etta Rosales, ginpakamalaut

**M**abaskog ang pagpamatuk sang mga grupo nga nagatib-ong sang tawhanong kinamatarung sa ginapaabot nga pagpili kay Loretta Ann Rosales bilang puno sang Commission on Human Rights (CHR). Si Rosales myembro sang kuno progresibong partido nga Akbayan kag nangin tiglawas sini sa Kongreso bilang tiglawas sang 1998-2007.

Tuman kadaku nga insulto kag indi mabatun-baton para sa mga pamilya sang mga biktima, mga tagasakdag sang tawhanong kinamatarung kag bisan mga empleyado sang CHR ang pagpili kay Rosales. Kilala si Rosales sa iya pagkangilad sa mga biktima sang malala nga paglapas sang tawhanong kinamata-

rung kag lakip ang ila mga pamilya. Sining nagligad nga mga tuig, paliwat-liwat nga ginabansagan ni Rosales nga "prente" sang Partido Komunista sang Pilipinas kag sang Bag-ong Hangaway sang Banwa ang mga progresibong organisasyon nga ginapasakupan sang halos tanan nga mga biktima sang mga paglapas sa tawhanong kinamatarung. Indi malipod sa ihibalo ni Rosales nga ini ang ginarason sang mga berdugo nga Armed Forces of the Philippines agud atakehon, patyon kag paantuson ang tuman kadamo nga aktibista kag sibilyan nga ginabansagan mga tagasuporta, kon indi man hayag nga myembro, sang armado nga rebolusyonaryong hublag. Amo sini ang ginpakita ni Rosales sa sulod sang siyam ka tuig nga wala kaluoy nga pagpamatay sang rehimeng US-Arroyo.


Kakoros man sang AFP si Rosales sa pagpanamad sa PKP kag BHB labi na sa panahon sang eleksyon. Ginpangunahan niya mismo ang kuno imbestigasyon sa "pagpangilkil" sang BHB sa mga kandidato paagi sa pagpangulekta kuno para sa *permit to campaign* kag iban pa. Ginpadaku pa ni Rosales ang kaugalingon nga importansya sang gindeklarar niya nga target kuno siya sang likidasyon sang BHB. Ginkadlawan lang siya sang mga kaupod.

Isa man sa mga pangunahon nga basehan sang pagpamatuk

kay Rosales amo pagbastos niya sa halambalanon sang bayad-danyos para sa mga biktima sang pasistang kalakasan sa idalom sang rehimeng Marcos. Sadtong 1986, sa pagpanguna sang organisasyong SELDA (Samahan ng mga ex-Detainee Laban sa Detensyon at para sa Amnestiya) nagpasaka sang *class suit* ang halos 10,000 nga biktima sang layi militar sa isa ka korte sa Hawaii para mahatagan sila sang danyos sang mga Marcos kabaylo sang ila pagtortyur. Makaligad ang anum ka tuig ginpanaog sang korte ang husga sini pabor sa mga biktima kag ginmandu ang paghatag sang \$2 bilyon nga danyos sa ila sa pagdumala sang SELDA.

Sadtong 1993, paagi sa Presidential Commission on Good Government (PCGG), naghimo ang rehimeng Ramos sang areglo sa mga Marcos para sa partehanay nga 75%-25% kon sa diin 75% ang pagauyatan sang gubyerno (pagagamiton man sang gubyerno ang mas daku nga bahin sini) sa baylo nga idiretso kag makadto tanan sa mga biktima kag ang 25% ipabilin sa mga Marcos. Sa atubang sini, ang pila ka personahe pareho nanday Rosales kag oportunistang traidor nga si Ramon Casiple nagtukod sang karibal nga grupo nga ginatawag Claimants 1081 agud agawon ang napadaog sang SELDA kag sang mga tiglawas sini nga 10,000 biktima. Ginsuportahan sang Claimants 1081 ang pag-agi sa reaksyunaryong gubyerno sang napadaog nga kaso batuk sa mga Marcos, amo man ang kasugtanan sang gubyerno kag mga Marcos.

Siling sang SELDA, makasuluka ang ginasisigahum nga pagpili kay Rosales bangud sa ginhimo niya nga pagtunga sa kubay sang mga biktima sang paglapas sa tawhanong kinamatarung kag pagpakig-areglo sa mga Marcos. **AB**





## Morong 43, hilwayon na!

**H**ilwayon na ang Morong 43! Ini ang unod sang bukas nga sulat sang Civicus: World Alliance for Concern Participation sa bag-ong administrasyon ni Benigno Aquino III. Ang Morong 43 gin-aresto sa isa ka paghanas-medikal sa Morong, Rizal sang Pebrero sa akusasyon nga mga katapo sila sang BHB. Ang Civicus ang pangkalibutanon nga alyansa sang mga organisasyong sibil nga nakabase sa South Africa.

Ginapangayo sang Civicus kay Aquino nga ipabatyag sa mga pamilya sang mga biktima sang paglapas sa tawhanong kinamatarung nga may pagkilala siya sa layi kag ipakita nga wala sang lugar sa “bag-o nga Pilipinas” ang amo nga pagpang-abuso. Ginbuyok sini si

Aquino nga imbestigahan ang AFP bahin sa pamaagi nila sang pag-aresto, pagdeteni kag pag-imbestiga sa Morong 43.

Ginduso man sang Civicus nga tapuson na sang rehimeng Aquino ang mga paglapas sa tawhanong kinamatarung paagi sa paglagas

kag pagbista sa mga nagtortyur kag iban pang pagpang-abuso sandig sa layi sang Pilipinas kag internasyunal nga makatawo nga layi.

Ang Morong 43 ginatapuan sang duha ka doktor, isa ka nars kag mga mamumugon sa ikaayong lawas. Duha sa mga babae nga detenido magabun-ag sa sulod sang kulungan sa Camp Bagong Diwa—sanday Carina Oliveros, 26, sa Hulyo kag si Mercy Castro, 27, sa Oktubre. Mabaskog ang suhestyon sang madamo nga mga lokal kag internasyunal nga grupo nga gilayon nga hilwayon ang mga detenido nga nagabusong. **AB**

## Mga upisyal-militar sa Panay, ginkiha sa korte sang banwa

**G**inkiha sa hukmanan sang banwa sa Panay ang pila ka mataas nga upisyal-militar sa Western Visayas nga imbolbado sa pagpatay kay Fernando Baldomero, *provincial coordinator* sang koalisyon nga MAKABAYAN sa Aklan kag katapo sang Sangguniang Bayan sang Lezo. Sa isa ka pahayag sining Hulyo 14, ginsiling ni Concha Araneta, tagapamaba sang National Democratic Front (NDF)-Panay nga umpisa nga tikang pa lang ang pagpasaka sang kaso sa hukmanan sang banwa para mahatagan sang katarungan ang kamatayon ni Baldomero.

Si Baldomero gintiro sang duha ka lalaki nga naka-*bonnet* sang Hulyo 5 sa iya puluy-an sa Kalibo, Aklan. Nagahanda siya nga idul-ong ang iya 12-anyos nga anak nga lalaki sa eskwelahan sadto. Siya ang pinakauna nga aktibista nga biktima sang ekstrahudisyal nga pagpamatay sa idalom sang rehimen ni Benigno Aquino III.

Bastante ang ebidensya nga uyat sang NDF-Panay para pasakaan sang kaso sanday Maj. General Vicente Porto, hepe sang 3rd Infantry Division sang Philippine Army (3ID-PA); Brig. Gen. Gerardo Layug, hepe sang 301st Infantry Brigade sang Philippine Army (301Bde-PA); kag mga elemento

sang Civil Relations Service (CRS) sa idalom sang nasambit nga mga kumand.

Suno sa NDF-Panay, pila ka bulan antes patyon si Baldomero nakabaton siya sang sulat-paandam nga nagapauntat sa iya nga mga pangpulitika nga aktibidad. Sang Marso 19, ginhabuyan sang duha ka granada ang balay sang iya nga mga ginikanan sa Lezo. Duha ka simana antes siya patyon, ginbansagan sang mga elemento sang CRS sang 3ID-PA sa ila “Army Hour Program” si Baldomero bilang “prente nga tinawo sang mga teroristang komunista” kag ang MAKABAYAN bilang “prenteng organisasyon sang mga terorista”.

Ang amo nga akusasyon pangpubliko katumbas sang pagmandu sa tanan nga mga ahente sang estado nga patyon ang target nga mga aktibista. May salabton man ang mga elemento sang CRS sa paglunsar sini sang programa nga anti-Baldomero.

Ang mga paghulag nga ini sang 3ID kag 301Bde-PA isa ka daku nga indikasyon nga ginplano sang militar ang pagpatay kay Baldomero. Labi nila nga gintum-ok ang ila nga mga kaugalingon sang hambalon sang tagapamaba sang AFP ang paltik nga linya nga ang krimen resulta kuno sang purgahan sa kubay sang mga rebolusyonaryong pwersa. Wala sang nagapati sa kabutigan nga ini sang militar, siling ni Araneta. Nahibal-an mismo sang publiko kag bisan ang reaksyunaryo nga militar kag pulisya nga mga ahente paniktik kag ila nga mga gaway ang nagpatay kay Baldomero. Duguon ang mga kamot sang militar, dugang sang NDF-Panay.

Sa subong padayon ang pagpangita sang dugang nga ebidensya kaangut sa krimen. Magpagwa ang hukmanan sang banwa sang mandamyento de aresto oras nga makumpleto ang mga rekisito. **AB**



## 20 suldado napatay, 8 armas naagaw sang BHB

**I**ndi magnubo sa 20 suldado ang napatay kag 20 ang napilasan sa mga taktikal nga opensiba sang Bag-ong Hangaway sang Banwa (BHB) sa nagkalainlain nga bahin sang kapuluan halin Mayo tubtub Hulyo. Lakip sa mga naagaw sang mga gerilya ang isa ka masanggan kag lima ka M203 *grenade launcher*.

**Hulyo 16.** Napatay si Sr. Insp. Alfonso Derraco, hepe sang pulisya sa Benito Soliven, Isabela kag malubha nga napilasan ang lima ka iban pa sang sila gin-ambusan sang BHB sa Baryo Danipa sang nasambit nga banwa. Maluwas sa mga pulis, lakip sa grabe nga napilasan ang isa ka sarhento nga kabahin sang Military Intelligence Battalion. Nagaresponde ang mga pulis sa ginreport nga pagsunog sang BHB sa traktora sang isa ka despotikong agalon nga mayduta sa Barangay Villa Luz sang sila ambusan.

**Hulyo 9.** Napapas sang BHB ang pito ka suldado sang *strike force* sang 52nd Division Reconnaissance Company (DRC) sa isa ka ambus sa Sityo Chawer, Samoki, Bontoc, Mountain Province. Nakaagaw ang BHB sang apat ka M203, isa ka M14, isa ka M4 *carbine* kag iban pa nga kagamitan militar. Lakip sa mga napatay nga suldado ang ila kumander nga si 1Lt. Lito Punio. Wala sang naagum nga kaswalti ang BHB.

Gin-ambusan ang pasistang yunit malapit sa *tactical command base* sang 501st Bde sa Baryo Talubin kon sa diin sila naghalin. Nagkadto sila sa Baryo Samoki para suportahan ang iban pa nga tropa sang 5th ID nga naglunsar sang mga operasyon militar batuk sa BHB.

Para tabunan ang ila nga kahuy-anan, ginsiling sang militar nga pakadto kuno sila sa isa ka mi-

syon medikal ang mga gin-ambusan nga suldado.

**Hulyo 9.** Walo ka elemento sang Marines Battalion Landing Team 8 (MBLT8), lakip ang isa ka upisyal ang napilasan sang bombahan sang mga Pulang hangaway sang BHB ang ginasakan nila nga trak sa Sityo Itabiak, Baryo Agutaya, San Vicente, Palawan. Ang gin-ambusan nga tropa kabahin sang Special Operations Platoon sang MBLT8. Gindala sa ospital sang Western Command sa Puerto Princesa City sanday 2Lt. Willy Pait

kag pito niya ka pilason nga mga tinawo.

**Hunyo 23.** Pagkatapos sang tatlo ka beses nga inaway sa kadudulman sang gab-i sa tunga sang BHB kag militar, duha ka suldado ang napatay kag duha ka iban pa ang napilasan sa Baryo Poponton, Las Navas, Northern Samar.

**Mayo 31.** Naagaw sang mga Pulang hangaway ang isa ka K3 *light machine gun* kag isa ka M203 *grenade launcher* sang ambuson nila ang mga suldado sa katung-anan sang Baryo GM Osias kag Baryo Bangon sa Gamay, Northern Samar. Pito ka suldado sang AFP ang napatay kag tatlo ang napilasan sa ambus nga ini. Isa ka Pulang hangaway ang naghalad sang kabuhi.

**Mayo 3.** Tatlo ka tropa sang AFP ang napatay kag duha ang napilasan sang maengkwentro nila ang BHB sa tunga sang Baryo Nagbubtac sa banwa sang Palapag kag Barangay Lanubi sa banwa sang Laoang, Northern Samar. **AB**

### POW, ginhilway na

**G**inhilway na sang Bag-ong Hangaway sang Banwa (BHB) sa basehan nga makatawo si Sgt. Bienvenido Arguelles Jr. sang 25th IB sining Hulyo 20 sa isa ka baw-ing nga lugar sa Monkayo, Compostela Valley. Gintugyan sang BHB si Arguelles sa kura paroko sang Monkayo kag mga lokal nga upisyal sang nasambit nga banwa.

Si Arguelles gin-aresto sa isa ka tsekpoynt sang BHB sang Hunyo 19 sa Sityo Mabatas, Barangay Upper Ulip, Mt. Diwalwal, Monkayo, Compostela Valley. Pila ka oras pagkatapos nahilway siya upod na niya ang iya pamilya.

Antes ini, ginhilway ang menor de edad nga elemento sang CAFGU nga upod niya nga gin-aresto.

Ang pag-aresto kay Arguelles paandam sa mga militar kag pulis nga nagaoperar sa sulod sang mga baseng gerilya, labi na ang nagapaniktik batuk sa mga Pulang hangaway kag masa, suno kay Ka Rigoberto Sanchez, tagapamaba sang Merardo Arce Command sang BHB sa Southern Mindanao Region. Dapat siling niya mangin paandam ini sa mga nagaserbi nga protektor sang mga dumuluong kag lokal nga kumpanya nga nagahimo sang malaparan nga operasyon nga manughimulos sa masa kag makahalalit sa kapalibutan. **AB**

# Pagrebyu sa PEACe Bonds

**I**ndi matago sang anuman nga pagpakuno-kuno nga limpyo sang mga upisyal nga naghalin sa nagligad nga rehimeng US-Arroyo ang pagkadalahig nila sa mga kagarukan.

Lakip sa mga may pinakadaku nga salabton diri sanday Corazon "Dinky" Soliman, nga ginpili liwat ni Pres. Benigno Aquino III bilang sekretaryo sang DSWD, kag Teresita Deles, nga ginbalik bilang Presidential Adviser on the Peace Process. Nadalahig sila sa maanomalya nga pagbenta sang PEACe Bonds kag sa kwestyunable nga ginkadtuan sang pondo halin diri. Ang *bond* (bono) instrumento sang gubyerno para makapangutang sa publiko o nagkalainlain nga institusyon kag bangko. Pareho sang iban pa nga utang, ini ginabayaran nga may interes pagkatapos sang natalana nga panahon.

Ang PEACe (Poverty Eradication and Alleviation Certificate) Bonds ginduso sang Code NGO (Caucus of Development NGOs) nanday Soliman kag Deles. Suno sa mga paha-yag sang Code NGO, ginpagwa ang nasambit nga mga bono para makatipon sang pondo para sa ila nga mga proyekto kontra sa kaimulon.

Ang Code NGO amo ang alyansa sang mga paltik nga NGO nga ginapadalagan sang mga kroni kag suod nga abyan ni Gloria Arroyo kag subong man sa kampo kag administrasyon ni Aquino. Indi lang nadalahig diri si Soliman kag ang iya bana nga si Hector Soliman. Sila ang nagapamuno diri, upod sanday Deles kag Marissa Camacho-Reyes, utod sang anay sekretaryo sang Department of Finance nga si Jose Camacho.

Sang Oktubre 2001, ginpagwa sang Bureau of Treasury ang PEACe Bonds nga nagabalor sang masobra P35 bilyon (P10.17 bilyon nga basehan nga balor kag P25 bilyon nga interes nga pagabayaran pagkatapos ang napulo ka tuig.) Ginmanipula ang subasta para maburaw

sang kahimbon nila nga Rizal Commercial Banking Corporation (RCBC) ang mga bono. Nagaserbi sadto ang RCBC nga alagyan sa pagpatuman sang padihot sang Code NGO. Para masolo sang RCBC ang pagdumala sa mga bono, ginlikom sa iban nga bangko kag *bidder* ang pagpagwa sang nasambit nga bono tubtob sa ulihi nga simana.

Sa kabilugan nga P10 bilyon nga naimbentong bono, nagalab-ot sa P1.48 bilyon o halos 15% ang komisyon nga nagakadto sa Code NGO, P200 milyon sa RCBC kag dugang nga P100 milyon sa duha ka personahe nga nagserbi nga tagapatunga nila. Ginhimbon man nila ang Bureau of Internal Revenue para ilibre sa buhis ang kita halin sa pagbenta sang PEACe Bonds.

Sang ginsita sadto sang Senado ang maanomalya nga transaksyon, ginpamilit sang mga upisyal sang Code NGO nga 10% lang kuno sang ginkita sini sa pagbenta sang PEACe Bonds ang nabilin sini para sa kaugalingon nga mga operasyon. Ang nabilin nga 90% o P1.318 bilyon ginpasulod sa gintukod sini nga PEACe Equity Access for Community Empowerment Foundation (PEF.) Ang PEF amo kuno ang magapatuman sang mga proyekto sa balayon sang programa nga kontra-kaimulon sang rehimeng Arroyo. Pero sa pagbista sa Senado pagkatapos makalkal ang anomalya, nahibal-an nga si Soliman kag ang iya asawa ang ara sa

likod sang PEF.

Diin nagkadto ang kwarta? Suno kay Soliman, ginapamangkot pa niya ini sa mga nagadumala pagkatapos siya "maghalin" sa Code NGO. Balibad niya nga nagamit ini sa mga proyekto nga pang-ayuda sa pumuluyo, pareho sang pagtukod sang maayo nga sistema sang ilimnon nga tubig kag pagpautang sa mga nagtukod sang gagmayan nga negosyo (*micro-financing*). Apang wala sang pamatuod nga nagamit sa ginsambit nila nga mga proyekto o napuslan sang pumuluyo ang kita nila sa PEACe Bonds.

Mas daku pa nga problema subong nga 2011 kinahanglan nga bayaran sang gubyerno ang kabilugan nga P35 bilyon nga balor sang PEACe Bonds.

Wala na sang nakuha ang pumuluyo sa paltik nga mga kontra-kaimulon nga proyekto sang Code NGO kag rehimeng Arroyo, nakasandig pa sa ila ang pagbayad sa ginkita sini halin sa pagbenta sang nasambit nga bono.

Ang mas mabug-at nga salabton ni Soliman bilang anay sekretaryo sang DSWD sa idalom sang rehimeng Arroyo amo ang pagpaathag kon ano ang natabo sa halos P8 bilyon nga pondo nga naghalin sa PEACe Bonds nga para kuno sa mga proyekto nga kontra-kaimulon sang gubyerno nga Arroyo. Wala sang nakahibalo kon ano ang nanigin mga proyekto, kon diin-diin nga ahensya o lokal nga gubyerno ini nagkadto, kag kon bisan sin-o nakabenipisyo diri. Wala sang nagako sa kubay sang Code NGO kag wala sang iban nga ginobra si Soliman kundi magbalibad nga may nahibal-an siya diri.





# Mahuyang nga sitwasyon sa Nepal

**N**agresayn sa pwesto si Madhav Kumar Nepal bilang punong ministro sang Nepal sang Hunyo 30 bunga sang pagpresyur sang mga Maoista nga oposisyunista sa sulod sang parlamento kag mga protesta sang pumuluyo sa kalye.

Siya ginpwesto sang rebisyunistang Communist Party of Nepal-United Marxist Leninist (UML) kag konserbatibong Nepali Congress Party (NC), makaligad nga magbiya sang Mayo 2009 ang Maoista nga punong ministro nga si Puspha Kamal Dahal.

Naobligar nga magresayn si Dahal sang balabagan sang taga-UML ang desisyon sang presidente sang pungsod nga pahalidon ang hepe sang hangaway nga si Gen. Rookman Gurung Katawal. Direktang ginbalewala kag ginlapas ni Katawal ang instruksyon ni Dahal nga kilalhon ang pagpamuno sang gubyernong sibilyan, indi anay pagpadakuon paagi sa mga bag-ong rekrut ang hangaway nga ginpanubli pa sa ginpatalsik nga hari kag sa baylo padasigon na ang pagtingub sang Pulang hangaway sa daan nga hangaway sandig sa mga prubisyon sang kasugtanan sa untat-lupok kag pagtukod sang bag-ong gubyerno. Pero sobra isa na ka tuig nga magpungko si Kumar Nepal wala gihapon niya makonsolida ang prosesong pangkalinungan sang Nepal kag napaslawan siya nga sakdagon ang bag-ong konstitusyon, nga isa sa mga rekisito sa pagtukod sang bag-ong gubyerno. Ginabasol sang NC kag UML ang CPN-M sa indi paglarga sang bag-ong konstitusyon, pero sa aktwal ang duha ka partido nga ini ang nagabutang sang mga sablag sa mga saligang reporma kag nagahimo sang madamo nga bag-ong kundisyon sa CPN-M sa proseso sang pagtukod sang bag-o nga konstitusyon.

Sang Abril 30, masobra 125,000 pumuluyo sa pagpamuno sang CPN-M ang nagralli sa syudad

sang Kathmandu para ipanawagan ang pagresayn sang punong ministro kag sang iya gubyerno para hatagan ang mayorya nga CPN-M sang kinamatarung nga mamuno sa isa ka gubyerno sang pungsodnong paghiliusa. Masunod nga adlaw, naglunsar ang mga pumuluyo sang Nepal sang pangkabilugang welga nga nagparalisa sa bilog nga Nepal sa sulod sang isa ka simana. Ginatilawan ini nga tapnaon sang mga *riot police* pero napaslawan sila bangud sa militante nga pagbato sang pumuluyo.

Sa handum nga maghiliusa kag mapadali ang proseso sang pagbabalik sang CPN-M sa poder bilang pinakadaku nga partido sa Nepal, gintinguha gihapon sini nga makignegosasyon sa NC kag UML. Sa ulihi nila nga pagsugilanon sang Hunyo 11, nagpanaog sang mga bag-ong kundisyon ang NC kag UML sa pagtingub sang rebolusyonaryong hangaway kag sang daan nga hangaway. Luwas sa panibag-o nga pagpili kag pag-isip sang pwer-

sa sang hangaway, ginduso sang duha ka partido nga dapat lusawon ang pwersang paramilitar sang CPN-M sa porma sang Young Communist League kag ibalik man ang tanan nga ginapag-iyahan sang nagaharing sahi kag kaaway sang rebolusyon nga ginkumpiska sang CPN-M kag Pulang hangaway sa sulod sang isa ka dekada nga inaway banwa. Suno sa NC kag UML, tubtub indi nangin sibilyan ang partido CPN-M kag indi mabalik ang tanan nga propyedad nga ginkumpiska sini indi nila mabaton nga magbalik sa poder ang CPN-M bisan ini ang may pinakadaku nga representasyon sa parlamento.

Agud makalarga ang proseso, nagpasugot ang CPN-M sa mga kundisyon sang duha ka partido kag nag-isa sila sa tatlo ka bulan nga dedlayn sa pagpatuman sini.

Sa subong, nagapabilin gihapon nga mahuyang ang sitwasyon pangpulitika sa Nepal. Wala pa sang napili nga kabaylo ni Kumar Nepal bilang punong ministro. Tinguhaon liwat sang parlamento nga makapili sang bag-o nga punong ministro sa sinapol sini subong nga Hulyo 21. AB

## 26 paramilitar, napatay sa ambus sa India

**B**aynte'y sais ka elemento nga paramilitar ang napatay kag duha ang napilasan sa ambus nga ginlunsar sang mga rebolusyonaryong pwersa sa Chhattisgarh sa India sang Hunyo 29.

Ang mga kaswalti nga mga katapu sang Central Reserve Police Force (CRPF) nga nagalakat pabalik makaligad nga maglunsar sang *clearing operation*. Sang makaabot sila sa Dhodai, 300 kilometros ang kalayuon sa Raipur, kapital sang Chhattisgarh, gulpe sila nga ginatake sang mga Maoistang pwersa. Naglab-ot sang tatlo ka oras ang inaway kag nabudlayan nga makapalagyo ang nabilin pa nga mga kaaway. Nakaatras lamang sila sang mag-abot ang reim-porsment. AB



## Welga sa India

Isa ka pungsodnon nga welga ang ginlunsar sang pumuluyo sang India sang Hulyo 5 para pamatukan ang desisyon sang gubyerno nga untaton ang subsidyo sa presyo sang langis para kuno makalampuwas sa nagadaku nga depisit sa badyet. Ginpamunuan ang welga sang mga partidong oposisyon, ang Bharatiya Janata Party (BJP) upod ang Communist Party of India-Maoist (CPI-M) kag Communist Party of India (CPI).

Ginatantya nga magaabot sa 5.5% sang Gross Domestic Product (GDP) ang mangin depisit sa badyet sang India subong nga 2010-2011.

Ang pagkuha sang subsidyo nagtuga sang pagtaas sang presyo indi lamang sang mga produktong petrolyo kundi sang mga iban pa nga mga balaklon, kag grabe nga ginkaakig sang pumuluyo. Halimbawa, ang presyo sang gaas nga ginagamit sang minilyon nga imol nga pumuluyo ang gulpe nagtaas sang 33% o 3 *rupee* (kwarta sa India) kada litro. Ang presyo sang gasolina nagtaas sang 6.7% o 3.5 *rupee* kada litro kag ang *liquefied petroleum gas*, 35 *rupee* kada tangke. Kaangut sini, nagtaas ang tantos sang implasyon sang masobra 12% halin sang ipatuman ang deregulasyon sang presyo sang langis.

Pinakaapektado sa 12-oras nga welga ang mga estado sang Bihar, Punjab, Kartanaka, West Bengal, Kerala, Andhra Pradesh, Rajahmundry, Orissa, Madhya Pradesh, Chhattisgarh kag Haryana, nga pareho nga ginpamunuan sang mga oposisyonistang partido. **AB**

## Paghulag sang kabataan-estudyante sa pungsod, madinalag-on

MADINALAG-ON ang ginhiwat nga pungsodnon nga adlaw sang paghulag sang mga kabataan kag estudyante sang Hulyo 16 nga may tuyo nga ipaabot sa rehimeng Aquino ang mga reklamo sang sektor.

Masobra 1,000 estudyante nga naghalin sa lain-lain nga mga unibersidad, kolehiyo kag hayskul ang nagpartisipar sa paghulag, luwas sa mga kabataan nga wala nagabutho. Ang National Day of Action for Education nga ginpamunuan sang mga progresibong organisasyon sang kabataan. Nagmartsa sila halin sa atubang sang University of Sto. Tomas (UST) sa España asta sa Mendiola sa Maynila. Nakibuylog man sa ila ang mga kabataang Pilipino-Amerikano.

May ara man sang kadungan nga mga aksyong protesta ang mga kabataan sa Angeles City kag Cebu City. Nagpiket sila sa atubang sang pangrehiyon nga tala-tapan sang Commission on Higher Education (CHED). Sa Iloilo City,

naglunsar sang martsa-rali sa sulod sang kampus sang University of the Philippines-Iloilo, amo man sa UP-Tacloban kag Mindanao.

Pagtalana sang nagakaigo nga badyet sang gubyerno para sa edukasyon ang pangunahon nga panawagan sang kabataang-estudyante. Sa talaksan sang United Nations Educational, Scientific and Cultural Organization, 6% sang Gross Domestic Product o kabilugang kita sa sulod sang pungsod) ang dapat nga itigana ang badyet sa edukasyon.

Ginaduso man nila kay Aquino ang pagpauntat sa pagtaas sang matrikula kag iban pang balayran sa eskwelahan. Ginahingyo man nila nga repasuhon ang mga kontra-estudyante nga polisiya pareho sang Education Act of 1982 kag Campus Journalism Act of 1991, kilalahon ang mga kinamatarung sang mga manunudlo kag istap sang buluthuan kag sakdagon ang awtonomya sang mga konseho kag pahayagan pang-estudyante.


## Mga tsuper, naglunsar sang protest caravan

NAGLUNSAR sang *protest caravan* halin Quezon City asta sa Mendiola sa Maynila sang Hulyo 15 ang mga myembro sang Pinagkaisang Samahan ng mga Tsuper at Operators Nationwide (PISTON) bilang pang-umpisa nga paghulag kaangut sang nagahilapit nga State of the Nation Address ni Aquino.

Tuyo sang paghulag nga ipaabot sang sektor sa transportasyon ang mga ginahingyo sini kay Aquino, suno sa PISTON. Una na diri ang pagbasura sa *oil deregulation law* nga isa sa pinakadaku nga pantus sa mga motorista. Ikaduha ang dalayon nga pagpauntat sang

sukot sa South Luzon Expressway (SLEX) kag pagkuha sang *value added tax* sa langis. Ikatlo ang pagrebaso sa maanomalyang proyekto sang Land Transportation Office (LTO) kag Stradcom Corp. kapareho sang nauntat nga Radio Frequency Identification Device (RFID) kag ikaapat, silutan si Arroyo sa mala-la nga korapsyon sini sa nagligad nga siyam ka tuig.

Ginaduso sang PISTON nga dapat sabton ni Aquino ang ila mga ginareklamo para indi masamad ang iya imahen kag indi siya lubos nga sikwayon sang mga drayber kag malapad nga pumuluyo.


**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XLI No. 14  
Hulyo 21, 2010  
[www.philippinerevolution.net](http://www.philippinerevolution.net)

Editorial

# Rebolusyon, di malutos sang kusog kag paniplang sang rehimeng US-Aquino



**S**a pihak sang pahayag sang rehimeng US-Aquino nga bukas ini nga makigsugilanon pangkalinungan sa mga rebolusyonaryong pwersa, wala pa man ini magsugod sari-sari na nga mga sablag ang ginalatag sini.

Una na diri ang mandu ni Benigno Aquino III sa AFP nga dugmukon ang rebolusyonaryong kahublagan. Agud himuon ini, mayor nga pagasandigan sang iya rehimen ang pasista nga pwersang militar nga may plano nga labi nga padakuon, himuon nga moderno kag dugangan sang armas, kagamitan kag benepisyo para sa mga upisyal kag tinawo sini.

Agud matigayon ini, nagakaraka subong ang iya rehimen nga magpatuhaw sang ginatos ka bilyong piso, sa atubang sang grabeng krisis sa nagadaku nga depisit kag pagpangutang sang gubyrno.

Sandig sa mandu sang ila amo, gilayon man nga ginlatag nanday Defense Secretary Voltaire Gazmin kag AFP Chief of Staff Ricardo

David ang militaristang linya sang rehimeng Aquino. Tuman kahambog nga ginhambal ni David nga handa ang AFP nga ipatuman ang mandu ni Aquino nga dugmukon ang rebolusyonaryong kahublagan sa sulod lang sang tatlo ka tuig. Gindeklarar man ni Gazmin nga dapat isurender anay sang BHB ang mga armas sini antes madayon ang sugilanon pangkalinungan. Kaladlawan ang mga deklarasyon nga ini bangud wala nagakinahanglan nga magbiya sang armas ang rebolusyonaryong kahublagan kag paliwat-liwat na nga napamatud-an sa nagligad nga tanan nga gintakda nga dedlayn sang papet nga rehimen kag AFP para kuno dugmukon ang rebolusyonaryong kahublagan nagpabilin nga satsat lang.

Wala sang kinatuhay sa hayagan nga pasistang linya nanday Gazmin kag David ang linya sang bag-o nga puno sang Office of the Presidential Adviser on the Peace Process (OPAPP) nga si Teresita Deles. Wala sang pagpaminsar nga ginsuportahan ni Deles ang linya nga DDR (*disarmament, demobilization* kag *reintegration* o pagdis-arma, pagbungkag kag pagsurender sang mga rebelde) sang rehimeng Arroyo. Bisan hayag nga pagpangguba ini sa

*Mga tampok sa  
isyu nga ini...*

**Plano sa pagpili  
kay Etta Rosales,  
ginpakamalaut** PAHINA 4

**20 suldado napatay, 8  
armas naagaw sg  
BHB** PAHINA 6

**Pagrebuyu sa PEACE  
Bonds**

PAHINA 7

## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa [angbayan@yahoo.com](mailto:angbayan@yahoo.com)